

**Regional News Unit AIR Aizawl
Monday, January 12, 2026
DTime - 7:30 -7:40 Hrs
AKASHVANI AIZAWL**

REGIONAL NEWS BULLETIN

HEADLINES (MORNING)

- **Larsap Gen. Vijay Kumar Singh chuan February ni 17 atanga tan turin Mizoram state legislative assembly inkhawm a ko.**
- **NEC chuan nikum December thla chhung khan Mizorama hmasawwna hna hrang hrang thawhna atan cheng vaibelchhe 4 leh nuai 89 a pe chhuak.**
- **Prime Minister Narendra Modia chuan vawiin hian Ahmedabad-ah German Chancellor Friedrich Merz a kawm dawn.**
- **Swami Vivekananda piancham pualin vawiinah National Youth Day hman a ni dawn.**

<><><>

ASSEMBLY SESSION

Larsap Gen. Vijay Kumar Singh chuan February ni 17 atanga tan turin Mizoram state legislative assembly inkhawm a ko.

Assembly secretariat-in hriattirna a chhuahah chuan Larsapin assembly inkhawm a koh hi Assembly pakuana inkhawm vawi 6-na tur a ni dawn a. Tun tum assembly inkhawm lo awm tur hi budget session a ni ang a. Finance changtu Chief Minister Pu Lalduhoma'n ZPM sorkar huna Mizoram tangka kum khat sum ruahman (state annual budget) a pharh vawi 3-na a ni dawn a ni. Assembly inkhawm ni hmasa ber leh ni dang pawh chawhma dar 10 leh a chanve-a tan tur a ni a. Ni engzat chhung nge inkhawm tur tih leh inkhawm hun hman chhoh dan tur chu assembly speaker Pu Lalbiakzama kaihhruai business advisory committee (BAC) thukhawmin an la rel dawn a. Sorkar lamin dan siam tur rawtna leh tihtur dang a chhawp chhuah tam leh tlemah assembly inkhawm ni hi a rei-in a rei lo dawn a ni.

Assembly secretariat atanga Akashvani Aizawl News in thu a dawn danin Speaker hi a zin dawn avangin BAC thutkhawm hun hi a hla deuh mai thei ni a rin a ni.

<><><>

ILP

Nikum September ni 13 atanga Sairanga rel a luh atangin vawiin thleng khan Sairang rel chawlhmunah Inner Line Permit (ILP) 23,001 pek chhuah a ni tawh.

Sairang Rel Station ILP counter atanga Akashvani Aizawl News thu dawn danin, nikum September ni 13 atanga vawiin January ni 11 thlengin Sairang rel station-ah ILP 23,001 pek chhuah a ni tawh a, nikum September ni 13 atanga December ni 31 thleng khan ILP 20,914 pek chhuah niin, kumin January ni 1 atanga vawiin ni 11 thleng hian 2,087 pek chhuah a ni leh tawh a, heti hian a vaiin ILP 23,001 pek chhuah a ni tawh a ni. Sairang Rel Station-a ILP pe chhuaktute chuan nikhatah rel vawi 2 lo thlen chang leh vawi 1 chauh lo thlen chang a awm an ti a, chawhrualin nitin ILP 160 atanga 170 vel an pe chhuak thin tih an sawi a. Rel rawn luh tan tirh nikum October thla leh November thla inkarah khan ILP an pek tam zawk te chu khualzin (tourist) an ni a, tunah chuan inhlawhfa tura lo lut (labour) leh Medical Representative (MR) te chu ILP pek zingah an tam tawh tih an sawi bawk.

ILP pek chhuah zingah Assam atanga lo lut an tam ber a, West Bengal, a bikin Kolkata-in dawtin state dang hrang hrang atanga rawn zin lut pawh an awm reng tih an sawi a, rel hmanga rawn zin lut zingah online kaltilanga ILP la an tam zawk chang a awm tih an sawi bawk.

Sairang Rel Station ILP counter atang hian October thla kha ILP pek chhuah tam ber thla niin, 6,547 pek chhuah a ni a, December thla khan dawtin 5,992 pek chhuah a ni a, November thlaah 5,765 pek chhuah niin, September ni 13 atanga ni 30 thleng khan ILP 2,610 pek chhuah a ni bawk a ni.



NEC FUND

North Eastern Council (NEC) chuan nikum December thla chhung khan Mizorama hmasawna hna hrang hrang thawhna atan cheng vaibelchhe 4 leh nuai 89 a pe chhuak.

NEC hotute sawi danin Mizoram tana sum pek chhuahte hi hmasawna hna hrang hrang - Lengpui a Fish Farmer Training Centre atan te, Serchhip district a Kawlri khua a Mizo Cultural Heritage Centre dinna atan leh Mizoram sorkarin information technology hmang tangkai a leilung hausakna haichhuak tur leh leilung hausakna dap chhuahna atana sum tam zawk a hmuhchuah theihna atana ruahmanna te a tel a. Mizoramin NEC atanga sum a dawn hi hmarchhak state-te'n cheng vaibelchhe 76 leh nuai 78 an dawn zing ami a ni.



VEHICLE REGISTRATION

Nikum October ni 15-a Khawzawl-a District Transport Office, hawn a nih hnuah vawiin thlengin lirthei 40 ziahluh a ni tawh.

Khawzawl DTO pisa atanga thu dawn danin Khawzawl DTO Office hawn hnu-ah Khawzawl HSS School Bus chu ziahluh hmasak ber a ni a. Lirthei ziahluh tawhte hi lirthei lian a la awm lova. Light Goods Vehicle (bungraw phur chi) 3, Light Motor Vehicle (LMV) 9, LMV mihring phura eizawna chi 1 leh Motor Cycle 27 a ni a, a vaiin 40 a ni. Hei bakah hian Driving License hi 28 an pe chhuak tawh a, Driving License pek chhuah tam ber hi Two Wheeler Driving License a ni.

DTO Office-ah hian tun dinhmunah hnathawk mi 6 an awm mek a ni.

<><><>

PRISON

Mizorama jail hrang hrang 11-ah mi tang 1,664 an awm a, lungin a leng zat (jail capacity) aiin mi tang 485 in an tam zawk a ni.

Mizoram prison department in a chhinchhiah danin, nimin January ni 10 thleng khan Mizorama lungin hrang hrang 11 ah te mi tang 1,664: mipa 1,466, hmeichhia 185 leh an fate naupang 13 an awm a. Central Jail Aizawlah tang tam berin mi 480 awmna turah mi 843 an tang a, a leng zat aiin 363 in an tam zawk a ni. District Jail Champhai in dawtin, mi 105 lennaah mi 149 an tang a, a leng zat aiin 44 in an tam a, District Jail Aizawlah mi tang 90 lennaah mi 122 an tang a, a leng zat aiin 32 in an tam a. Women's Jail, Aizawlah mi 96 lennaah mi 127 an tang a, a leng zat aiin 32 in an tam a. District Jail Lungleiah mi tang 109 lennaah mi 123 an tang a, a leng zat aiin 14 in an tam zawk a ni. Hetihlai hian District Jail Saitualah mi tang pakhatmah an awm lo thung a, District Jail Serchhip, Mamit, Lawngtlai, Kolasib leh Siaha ah te pawh mi tang leng zat aiin tang an tlem zawk a ni.

Mizoramah dam chungga jail tang tur (lifer) mi 55 an awm mek a ni.

<><><>

CHOLERA

Tuihri leng avanga Lawngtlai district leh Myanmar inkalpawhna khar chu hlih a ni ta.

Lawngtlai district magistrate Pu Donny Lalruatsanga chuan tuihri natna leng avanga December ni 23 atanga Lawngtlai district leh Myanmar inrina zawng zawng kharna thupek a lo chhuah tawh chu a hlip a. Hlihna thupek hi nimin atanga hmang tanin ramri hi hawn a ni leh tawh a. Lawngtlai a Lairam Christian Medical Centre & Hospital a tuihri kai mi 8 enkawlte pawh an dam leh vek tawh a, hri kai belh an awm lo bawk a ni. Lawngtlai district-ah hian tuihri leng avangin November thla khan mi 6 an thi a, December thla khan mi 4 thi lehin he district-ah hian nikum kum tawp lama tuihri natna len vangin mi 10-in nunna an chan a. He hri leng hi a tirah enge a nih hriat a ni mai lova, Zoram Medical College & Hospital laboratory a endik a nih hnu-ah tuihri a ni tih finfiah a ni.

Tuihri len vena tho Siaha district-ah chuan hri leng a zia-awm hma avangin December ni 23 thova ramri khar thupek chhuah chu January ni 4 khan hlih a lo ni tawh a. Siaha district-ah hian November thla khan tuihri natna avangin mi 3 an thi a. December thla khan hri kai mi 6 an awm leh na a, nunna chan an awm belh tawh loh bakah an vai hian enkawl dam an ni tawh a, hri kai belh report a awm lo bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BIOMETRIC ENROLMENT

Mizorama awm mek Myanmar raltlante mitnaute leh kutze thla endik hna kal mekah za zela 80 thelh hna zawh a nih tawh.

Home department atanga thudawn danin Krismas leh kum thar vuakvet velah pisa kai hun a tlem hle chungin Myanmar raltlante biometric enrolment kalpui mek chu chhonzawm zel a ni a. Tun Zirtawpni thleng khan raltlan awm mek mi 30,463 zinga mi 24,191 te biometric enrolment tihfel a ni a, chu chu za zela 79 point 41 a ni. Aizawl, Lunglei leh Serchhip district-ah te chuan Myanmar raltlan awm zawng zawngte mitnaute leh kutze thla endik a chhinchhiah vek a ni tawh a. Khawzawl district-ah za zela 94 point 19, Kolasib district-ah za zela 93 point 55 leh Mamit district-ah za zela 90 point 58 zawhfel a ni tawh bawk. Myanmar raltlan tamna ber Champhai district-ah chuan za zela 79 point 31 zawhfel a ni a, raltlan tamna ber dawttu Lawngtlai district-ah erawh za zela 53 point 33 chauh zawhfel a la ni.

Champhai district-ah hian Myanmar raltlan 13,098 an awm mek a, Lawngtlai district-in dawtin raltlan 6,017 an awm a. Tarlan tawh angin raltlan awm tam dan indawta pathumna, Aizawl district a raltlan 4,159 te chu biometric enrolment tih zawh vek a ni tawh a ni.

<><><>

PM & GERMAN CH

Prime Minister Narendra Modia chuan vawiin hian Ahmedabad-ah German Chancellor Friedrich Merz a kawm dawn. Hruaitu pahnihte hian Sabarmati Ashram an tlawh dawn a. Hei bakah hian Ahmedabad-a Kit Festival ah an tel dawn bawk a ni. Prime Minister Narenra Modia leh German Chancellor Mertz te hian India-Germany Strategic Partnership chungchang an sawidun dawn a. India leh Germany thawhdunna hian kuminah Kum 25 a tling dawn a ni.

<><><>

NATIONAL YOUTH DAY

Swami Vivekananda piancham pualin vawiinah National Youth Day hman a ni dawn. Vawiin hun hmannaah hian Prime Minister Narendra Modia chuan Viksit Bharat Young Leaders Dialogue 2026 kharna New Delhi-a neih turah hun a hmang dawn a. Ramchhunga thalai sangthum chuang kalkhawm te nen hun an hmang dawn a ni. He hunah hian Prime Minister hian Essay Compilation for Viksit Bharat Young Leads Dialogue 2026 a tlangzarh dawn bawk a ni.